

槐野先生存笱稿

槐野先生存笥稿卷之十七

左輔王維楨著 館甥渭上南師仲編

雜著一十二首

御試喜雪賦

擬 賜翰林學士宋濂以所選良馬并爲 製

歌謝表

大司寇箬溪先生顧公像贊

咸寧令齊子像贊

并引

荅尹朔野啟

請南吉士啟

請東體枕啟

中秋延賓啟

壽薛渭野帳詞 并引

贈楊刺史帳詞 并引

孝烈皇后鼓吹詞應制

南寺避暑詞

雜著

御試喜雪賦

時維玄冥之月北風增嚴萬彙蕭騷層郊落漠九漢
沈寥墨卿牽輿于梁園鄭老纓情于灞橋英辟待賞

于雪宮剡人伺夜而鼓撓况夫三白兆瑞 當宁軫
懷白雪逸調孰發現才爾乃玄陸降坎青達升震同
雲黶隼冲風釀醞剪澄江之瓊練舞天花于千仞僊
子御麻衣而搏空瓊屑學楊花而吹鬚由是騷人詞
士志爽神怡攜詠登臺炯炯光迷北望燕然之山東
眺扶桑之枝中觀仙人之掌傍臨黃金之陂山增槩
而嵯峨樹分葩而負竒危掌箚天而璀璨故陂積玉
而陸離載駘游客則有謝家吟調孟氏風流揮麗藻
以模象問梅花于瓊樓載睹景物則有皓鶴擬鮮白
鷗比素藹藍絮于回飈綴壁英于綺樹由是竟日徹

宵層飄疊委突矣數尺皓然千里多稼滿望于甫田
有年將出于太史則見蝗種斃土鼓鳴柳堤白麥壠
青窈窈灑灑脉脉縈縈光搖明月之野影浮白玉之
城 宸闈覽瑞以開顏群工占歲而適情三農有賴
而忭舞九衢喧笑而蜚聲俯仰堯天熙皞無營氣調
人和逸興適生乃嘯良儔涉靈象踏瓊瑤恣玩賞燁
然珠玉之零霏况爾春光之交益逮夫暮景相禪銀
魄流波乾坤一色泛亭棹歌雪月在庭棹歌在阿異
哉竒乎此樂如何然俄懼其耽康而溺權也迺睹嘉
祥抽冥契悟清標訂新誓其薄冲虛而六出續紛也

有似乎高人志士放懷于宇宙者莫之能繫至夫匪
郊原而萬品歲蕤也有似乎豐功偉烈霑澤于海堦
者莫窺其際象圭璧以示絜錯六英以示秣昉貞松
而覺操倚寒梅而思儷尤願化育恒普協氣常調

帝德增懋

皇澤彌高萬代陋黃竹之詠九垓麥白

雪之誼於是載忭載舞爲之歌曰二氣冲融瑤池蔽
空 帝降祥兮墜于隰原珠玉彌阡懽聲揚兮惟天
惠民六合同春 帝德光兮淑和布濩百工安化樂
無疆兮樂無疆兮祝 吾皇兮祝 吾皇兮協虞唐

今

一

不
全
和
擬 賜翰林學士宋濂以所選良馬并爲 製

歌謝表

洪武九年某月某日翰林學士臣宋濂伏蒙 聖慈
以所選良馬并爲 製歌以賜臣者 神駒在馭特
分 御府之珍 睿藻傳神驚覩化工之妙旣聞嘶
而知 德亦持 扎而懷慙臣誠惶誠恐頓首頓首
上言伏念臣濂雕蟲小夫駑駘拙品生當勝國之季
居在深山之中竄形影以圖存望風塵而增愼著鞭
首事空憐祖述之雄歷塊非材敢慕孫陽之遇會
真主崛起之始正遺賢待出之時過采虛名至勤再

三之驛召曲承 渥眷親睹九五之 龍飛遂令徧
歷于高華未嘗少責以奔走叨塵 異數首尾十年
感過隙之迅駒漸空華髮愧馮軒之衰鶴恒抱汗顏
剪拂何施馳驅難効况乎三出三入髀消乘傳之餘
兼以一節一趨力匱登臺之後歎龍鍾之已甚瞻
鳳閣而不前豈期待廢之軀翻 軫益隆之顧簡六
閑之寶駿群無留良揮五色之雲篇特將貌雅不重
懋德懋功之賞忽臨私人私第之門臣乃想容與于
賦中察風神于階下得言得意而得象掩周王黃澤
之謠和律和呂而和聲陋漢帝蒲梢之曲美而知愛

捧琬琰以驚心感極生悲撫樊纓而雪涕一跌之虞
可免千官之眷誰先茲蓋伏遇 皇帝陛下 冠古
威神 御圖廣大用三驅以取順馳八駿以除殘日
月煥乎重明乾坤帖爾再定 義降江表畢收倚馬
之才 詔下域中至有墜驢之笑駕馭一時之豪傑
廓清萬里之妖氛有如愚臣亦冒 殊獎彼竒才之
蘓子甘爲前驅若安國之康侯尤當退舍何悟一朝
之 錫仰同二氏之榮鳳臆龍鬣攷馬經而特異過
堤趨 闕從人欲而不違乃知大宛之種非凡而益
信 王者之言有驗也所愧難報者德但徒懷裹黃

之思不待者年亦無多據鞍之日第當勉尋舊學堅
保初忠踐霜雪而全身無羨莊生之論當晚莫而求
道庶酬齊主之知伏願 朽索馭民兼金賈士求定
萬年之軌先登九方之明華山之戰騎咸歸在在歌
鎬君之德黃河之瑞圖忽出煌煌表義后之靈臣無
任瞻天仰 聖激切屏營之至謹奉 表稱 謝以
聞

大司寇箬溪先生顧公像贊

有義其冠而袍則朱腰犀胸鶴厥狀訐訐彼貌者誰
姓顧系吳司寇是職仁者是呼胡以稱仁續斷吹枯

訟牒盈萬一寃則無維昔臯陶擅敷有虞沿逮漢世
陰德惟千代遠風微蒼鷹爲徒豈惟蒼鷹更號曰屠
萋非張臯鉤棘仆軀民生疇重眇于葭李仰天冥冥
不聞我吁籲帝帝遙沈沈紫樞孝娥竟枉越父輒拘
愆和干咎 帝德良孤以水以旱崇當其區茲孰爲
者深文之夫於美司寇穆穆鉅儒爰究經術古訓是
模欽之恤之嬰孩閔辜彼核彼詰我原我蘓飛鸞走
駟念與之俱輕脫犯蹕重用鞭蒲茫茫大楚亢極而
巫召祥導和旣沾旣濡誰謂偶獲愷悌攸爭黃口喧
頌赭衣去途物亦類感省樹集烏於美司寇魁顏巨

顛馮馮大腹并貯江湖孔曰仁壽斯言匪迂陰隲終
古今同符茲年既耆杖不用扶眉秀華蓋目炯驪
珠嶷嶷嶽立矯矯鳧趨唐生在側齶顧瞿瞿筭數焉
極彭錢可逾余言罔誕徵之斯圖徵斯仰斯脉脉動
吾

咸寧令齊子像贊

并引

此咸寧令雲汀齊子像也雲汀初令蒲蒲人德之乃
募工擬容用志弗忘辛丑之冬雲汀屬公游及華蒲
父老越數十輩浮渭奔謁念往泣離持圖以獻若曰
考公似者嗟乎召稱去思張傳遺像邈代音徽溘爾

輟響乃如雲汀所獲詎可言今無古人哉余乃恫懷
時政欽厥令美爰製四韻式闡孤芳贊曰

傷視彼民雲汀之志民用不傷雲汀之事彼奪者誰
失此人龍爭公弗獲慕公之容巖額星瞳依稀克肖
秋凜春煦顧吳失妙瞻依有托無論一毛求所似公
麟閣丹青

答尹朔野啟

讀所惠書詞俊俾駢駟貫擬連珠珍等睥盤爛方簇
錦固以鬼目怵衷欽容避舍則斯作者誠四六之博
徒文章之宗匠也繁自漢魏寢響晉宋承風降歷四

朝各裁一體總之雕鏤金碧之章協比宮商之韻角
竒逞秀傾五內之精探異搜冥洩二儀之秘猶之鄭
旦姬閭不同形而共媚園椒江芷非一氣而俱芬葢
炳然有象蔚然有光矣世代旣移華豔隨落於是操
觚之士侈口西京卑睨江左匪刀藥之爲媿直才情
之自索爾至若君侯之詞則洪鐘警發而待扣苑藍
具染而出音音不厭聽色無輟觀可以比肩顏陸敲
頂潘張固不必托李竒之高調假相如之夙稱其音
自遠其傳勿疑也顧其撰意命篇緣抒孤憤而徵詞
引類咸屬微言則又靈均之諷諭嗣宗之避隱達者

增唏昧者弗可測也君侯飽黃石之馘兼彩毫之技
翌日建牙帟帳草檄龍城固無俟陳琳之爲記室孫
楚之作從事矣蒙采芻言竟期布諾方有他奪敢勞
後命乎哉

請南吉士啟

恭惟百年門望衣冠承奕世之休八斗才華文賦挾
擅場之譽顧殺馘之弗競垂族姓之無聞豈意高賢
能親非耦引薰葭而延玉樹袞表輕微張簫鼓而列
綺筵深慚接遇合松上施蘿之雅續浦中伐木之歌
感私寔切于銘心酬計將期于枉趾夙陳薄宴穆下

良辰乃于八月十有九日牛馬走擁簪當門望光塵
而跼踏雲霄客乘槎上漢露玉露而歸來屬從徒間
暇之時當灑氣空澄之候命觴如魯徵樂惟秦聊將
合二姓之歡情誰道羅八珍之奇品場苗何物欲維
千里白駒世德非輝敢下九苞赤鳳饋魚書而遣使
思鶴駕而顧吾幸誠闔人無留門者

請東體忱啟

伏以喬木高門許絲蘿而上引華堂嘉宴擬秦晉而
交歡倚玉爲榮報李是愧茲者言申卑悃穆卜良辰
以今月二十七日誕陳鷄黍之筵妄意冠裳之會敢

謂北門之學士聊爲東道之主人星聚荀家知太史
明朝必奏氣占尹氏望僊車應日來臨

中秋延賓啟

伏惟浮踪梗泛漫作江湖之遊逝景駒過俄驚歲月
之積項還初服幸值中秋戒酒正而命尊要蘭朋而
對月雖茅堂竹逕遠謝西園之珍木瑤華而皓魄高
空頗擬南樓之遐觀曠覽願尋舊轍言赴新盟懼水
鼓之易馳期玉山而共倒

壽薛渭野帳詞

并引

時維季春和風放渭川之花柳律當姑洗遲日麗雍

土之河山世際昇平域開仁壽祈黃耆而尚齒義重
于古人介眉壽以延年情篤于今日恭惟涓野先生
執事斯文正脉天府竒才問學宏深髫年已擅名于
文囿器宇俊偉弱冠遂震望于儒林論文登顯科三
秦驚看行空之天馬獻策取高第四海爭識絕代之
人龍花封小試牛刀閤井仰嚴明之治夏官大展驥
足豺貅歸統馭之方自古直道難容於今高才多妬
尊鱸馳思情懷鷗鷺之洲琴鶴還關夢斷麒麟之閣
陶情物外適意林間茲惟三月良辰閤苑黃鶴傳玉
笈是謂六十初度海屋仙人獻壽籌王液瓊漿交梨

存言系
卷十七
火棗綺筵開華屋瑞氣綢繡王宇弄瑤箏仙音嘹唳
衣冠濟楚禮樂繽紛貴戚如雲高朋滿坐真塵寰之
羽客請擬八百歲而爲春乃陸地之謫仙願祝十二
會以紀壽此固人生之大快作德之餘慶也僕躬逢
盛事無任懽情欲罄鋪張必須音什勉綴蕪詞用祝
華筵詞曰

春花鬪巧正值春光好東海上來青鳥今年桃更多
此會公須到嘉慶也從天祐得君壽考 看珠圍翠
繞聽簫韶縹緲襟懷濶乾坤小金尊飛座上明月轉
花稍從今後海田數變人難老 右調千秋歲

贈楊刺史帳詞

并引

伏以 天子徵九牧之金以鑄鼎義取安邦大夫佩
五侯之玉以分封志存報 主得郡苟愧于製錦承
恩終負于揮金若此遭逢可勝慶慰恭惟大刺史彬
菴先生執事沿執戟之華胄挺聯璧之上姿系出鳳
城故聞四海九州之畧家隣庠觀嘗窺三墳五典之
微問學淵源神情秀朗望之罔不退舍見者倒其前
徒遂使冀北千金價重燕臺之駿圖南萬里風高越
海之鵬卓爾儒林蔚爲國器懷王無勤于三獻奪標
眞勝于五言乃者吉協夢刀榮分割竹英妙如終軍

而御才則慎瑰竒如賈誼而議事不疎顧茲劇州寔
稱孔道路通巴峽甸接長安非膺遊刃之才寧奉解
繩之旨淮南無一事而晝卧鈴閣常閒河內緣萬畝
而時巡檐帷鎮捲希心古烈高儼華峯十丈之蓮抗
跡時流清俸渭曲千尋之水九江已見其度庖三郡
盡爲之還珠春省動兩岐之謠夜作收五袴之譽少
年挾彈而潛亡他縣不聞探囊長老扶藜而遮拜中
衢願爲立石屈指計美尤恐十失五之在茲捫心嗟
時將無萬有一之難獲適承臺獎允副氓懷抑揚進
退之間風俗教化所在誠使赤車下 召當彰黃霸

之能 玉璽加褒乃表龔公之績僕也墮身關輔濫
齒詞曹由今人而觀古人歎傷滿目自結髮以至華
髮攬采彌襟他人之賢及肩而已我君之政居首裒
然踴躍實倍于常倫品題難混于同日情均拔莖詞
代歌崇詞曰

矯矯龍鱗隨風雲盤轉上通寥廓 帝念西州千家
萬井參錯驅龍下界爲茲方甘雨時落到如今桑麻
徧野處處人家歡樂 兒童群立華薄待行春相逐
再四期約只恐 徵書一朝頒下鸞閣將玉人天上
歸去吾曹寂寞聊且把酒漿奉壽留取一錢贈却

右調漢宮春

孝烈皇后鼓吹詞應制

燕山北望鬱陵關
雷鼓嘈嘈向曉發
黼車行榆汁滑
馳道蜿蜒盤似髮
笳聲鳴未歇
空嶺永埋明月冠
冕千嗟萬咄此際魂超忽
右調應天長

南寺避暑詞

萬里驕雲千山赤
日人在洪爐
雙翼難生十洲阻
向蹙卧松廬
天風陡起南隅繞
林壑那羨蓬壺倦遊歸
去月中跨鶴花底鳴駒
右調柳梢青

槐野先生存笥稿卷之十七

槐野先生存笥稿卷之十八

左輔王維楨著 館甥渭上南師仲編

祭文二十二首

告華嶽文

告武安王關公文

再告關公文

祭華巖東侍御文

祭鄭亭東大夫文

祭劉隱君文

同鄉合祭馬西玄先生文

同鄉合祭呂涇野先生文

詞林合祭呂涇野先生文

詞林合祭張陽峯先生文

謁侍歸展告先公文

祠堂成祭告文

祭甘經歷文

祭外舅半山郭公文

詞林合祭王懋中太史文

同館合祭王太史文

祭先考贈君文

祭叔父王次公文

祭前山先生文

祭孫通府文

祭贈君墓文

祭仲父質菴公文

祭文

告華嶽文

嘉靖三十四年歲次乙卯閏十一月壬戌朔越初九日庚午南京國子監祭酒華下生王維楨謹設牲醴告祈于西嶽華山之神曰頃者楨之母劉病在里

中而報至京師也楨乃疏請 天子乞歸而侍疾焉
天子下吏部議吏部顧尼疏不行以楨徙今官令便
之西於是 天子可之乃茲行過祠下徼惠于嶽神
唯垂明聽而賜鑒焉夫祥青旣福皆天所畀楨旣已
知之矣然竊聞五嶽者視三公也三公不敢上僭君
權然法得以告令主澤下流也楨今徙官而西者是
已假楨獲臯于高玄則青當著其躬不宜累及所親
卽若非臯或盪氣流薄突至偶值嶽神亦宜白之高
玄令勅司命真宰驅彼二豎而還此四體不得令慈
闈坐痿孤兒銜恤也且神血食金方職在保育群生

禦災扞患今母劉災患若此獨不當扞而禦之乎母
劉天性醇篤事神最謹嶽神所洞鑒也乃顧令疾甚
禮神者蒙災慢神者柰何哉今夫境有旱澇禱之輒
應吐霧吞雲效不移時若是乎其靈且異也今楨所
禱爲親乞命又非直旱澇之比矣嶽神顧恻使之延
時日乎楨故守史官凡山靈川異不嫌特書卽嶽神
顯庇令母劉疾已楨力當撰錄其事傳之永永以彰
嶽神之惠唯垂明聽而賜鑒焉

告武安王關公文

義勇武安王關公祠下今月二十日家報來言楨之

母劉太孺人以九月二十八日感冒風疾半身不隨
語言蹇澁報至楨神魄飛越不知所爲竊惟大王足
下英靈振于千古前知通于九天卽如母病目前可
復大王幸明示之脫若纏綿不能遽爾去體大王亦
明示之或用醫藥收功或因禱祀求痊二者皆世俗
抹疾者之恒道也果若從事于斯二者可以愈母之
疾楨亦不憚隨俗期在解親之厄而已大王亦明示
之楨嘗讀漢史睹大王之英烈忠勇未始不氣爲之
壯神與之依也仰惟大王鑒此素衷憐此哀祈露機
于未萌告事于將至卒之有效楨當曳屨祠下手將

辨香庸展謝私且欲爲大王論撰往蹟闡發幽懿以
補譜牒之所未具惟大王憐察之

再告關公文

今者楨以老母病廢之故計將具疏上聞欲圖終
養第官叨侍從事取宸斷所繫匪輕今疏或可或
不可或就或不就唯明神示之楨將據之爲行止也
語曰卜以稽疑楨平生無疑事而爲親圖歸又未足
置疑所恐恐者獨懲于近事以故弗敢直遂耳又明
神之靈照通于四海而察于九玄故不恤再瀆再拜
稽首而敬使卜之唯示之筮詞焉

祭華巖東侍御文

嘉靖庚子華巖叔丈東公卒其年十月十有二日將
奉公窆焉而史官王維禎者公故女姪婿也以先期
奠有辭辭曰我崇我着我載我酒縞帶練袍酌公柩
所公氣豪絕公性慷慨英魂不流瞻也如在嗟惟巖
公卓哉岌岌孕華而生肖華而立侃侃者論矯矯者
風光邦震代急電長虹乃世弗諧縣車特早歌觴永
日丘園娛老人言龍卧公曰鴻冥遙岑孤杪弋彈何
驚巖月溪花青娥白紵彭澤徜徉東山容與閱年六
袞笑口常開袍崢豸角庭擁麟胎而壽而昌有先有

後江東王謝關西韋杜言念貴游建節鳴騶百歲如
矢樂不償憂所嗟公者摩霄俊鶻空群逸馬孰安孰
危孰多孰寡所嗟公者俊鶻鎩翮逸馬窘步空負蒼
生竟阻遐鶩追惟晉陽驅車淮海攬轡都亭埋輪行
行者避可謂無具者哉胡階萑非成此屯蹇雲不爲
霖悠悠在山嗟乎仲尼天知子輿不遇杜甫窮愁李
廣失利或海或桑或帝或昇星輝月晦尺短寸長數
也何常而奚爲巖公傷哉乃亂曰化而往者同邪合
而終者獨邪巖巖者華邪百千萬禩付與不朽者公
邪

祭鄭亭東大夫文

嘉靖庚子奉直大夫工部營繕司郎中鄭亭東公甫
及葬時翰林院檢討王某以告在里取十一月二十
六日脩奠事公丈人行也再拜哭且告之曰公之死
死荆楚長沙城汨羅所賈誼足幽儔屈平爲冥友公
之葬葬城西土窿窿艸萋萋何時化成鶴一來華表
啼公死公安我悲我悼吉人弗穀志士毀造一悲殼
咽一悼淚橫再悲再悼月慘雲亭悲悼悠悠望南垓
魂乎魂乎來未來洞庭緬渺衡嶽崔嵬精爲澤畔芷
氣作天南雷我握彤管賦此招魂英英鄭老來鑒予

言公心如石公德如醇公才如办公政如春天乎不
弔負此吉人喟昔金閨接珮紫陌逐風招邀酒斝酌
唱詩筒而今也素幃在堂丹旆在宇椒醑酌沙雍門
歌戶俛仰今昔哀懽殊科涕匪無從漸漸縣河彼人
曰拘哉王生孤峭違常哭死獨傷胡薄此生胡厚此
亡嗟嗟鄭老疇當鄭老疇當

祭劉隱君文

嘉靖辛丑之秋劉隱君西野翁卒其子華州刺史龍
坡公聞訃絕復蘓者數四已爲位以哭華州人王維
楨者官翰林檢討維時謁謝在里取昔人七哀之誼

布奠抒忭欽風喟德爰託告于茲文辭曰曩余好此
竒遊兮迺東極乎蓬瀛覽金臺之故墟兮訊桂苑之
殘楹往者旣不可跡兮羌延佇而怍怍翁迺產臺側
而廬苑左兮洵好修而繼轂驅驥于于萬里兮恐燕
昭未之曾致執蘭種玉雜品桂而羅砌兮視十郎其
不啻謂一代之簪組兮形拘拘若桎梏侶安期而挾
美門兮遂平分此閨壺朝晞髮于扶桑兮夕吸瓢于
沆瀣走浮丘而避潔兮俛龐公而下拜誦 皇王之
御宇兮風沕穆而熙洽信老安而少懷兮徧谷野其
相狎爾其歷寒燠而七十換兮更 四帝而化之洵

堯舜之逸民兮揆巢由而亞之苟令德其孔章兮又
何必結纓冕也彼乘軒而竟爲鶴兮非斯世之所鮮
也弃顯融而弗履兮諒嗣彥以取償曠俛仰其何惡
兮縱偃蹇而相羊白日忽其不淹兮羌俄及乎嶮巖
少微晻曖而靡光兮菊渝節而殞枝空瀛島之次瀟
兮紛鶴怨而鳳哭余豈不知古稀之洵美兮踐彭蠡
猶謂之蹙仰高漢之茫茫兮下哀鴈之嘈嘈傷令子
之藥藥兮值風雨之蕭蕭悽旅魂之營營兮共夜烏
之啾啾灑雙涕之浪浪兮隨東派而悠悠猥余小子
兮景休明而鍾慕夫旣不獲承顏兮又重以殊路念

伯夷之抗行兮附馬遷而轂施依太史之遺則兮握
彤管而櫛詞亂曰燕有隱君曰西野兮含德弗耀子
萬里馬兮旣壽且祺世其寡兮桂酒椒漿我其瀉兮
霽乎千里假弗假兮

同鄉合祭馬西玄先生文

天眷 皇朝 聖神聿起篤生哲人爰作 帝使於
燦我公降命上玄秀毓崑崙瑞應奎躔託景風雲結
知 九五九五嘉樂需汝霖雨白日忽匿梁木易頽
長駕促塗吉望凶來 天子曰咨喪我股肱殲良昧
理福善無徵邦無笙竽士有吟嘯矧我共域而不斯

弔厥初鷹奮爰集石渠疏留八駿氣奪萬夫批鱗逆
怒一麾出守淮陽臥理穎川歌母太微重煥吉士再
征賈歸宣室朔侍承明穆穆辟雍祁祁髦士公其貳
之標立景附乃歷銀臺乃領留均兩都並蹈六館咸
甄惟 帝懷賢還公薊 闕夙夜惟寅五禮遂發
帝曰休哉蕪秩示輝朝臨南署暮對北扉誕陟泰階
克毗克載雲滅雨絕吐心竟背長沙悲鵬曲阜悼麟
賢聖恒厄異世同塵猗歟先生身固遭時學弗阿世
外若溫夷中實貞厲凡夫踰閑恭人矜細于道苟合
于俗寧盤至其潛機玄鏡旁燭無際執權應物靡隨

靡滯是則上智無明末塗罕儷猗歟先生幻綜篇翰
遂握真詮寢閔寢肆海蓄雲宣聰窺妙解道寄遺編
班揚接軫陸謝執鞭文明之代作者犁然大雅旣逝
朱瑟絕絃猗歟先生體潛敷燿數短道長劔埋浮彩
蘭死存香 帝念前徽考謚增職隆章寵數光照中
域輻軒宵戒丹旄晨飛違此皇局玄室是依開阡京
兆礪石蒿里臣義 君恩紀厥終始嗟嗟我土形厚
且龐奕世育賢長發有祥迺今武功修文高陵挂劔
渭南藏舟上郡辭殿四氏接零關河漸虛悲鄉喟運
相視漣如祖公于郊停驂景夕高城愁入隣人夜笛

同鄉合祭呂涇野先生文

嗟乎先生歿矣五星隱曜太華摧峯秦人加痛海內
寡悰嗟乎先生少綜經術壯侍 明廷疏獎列政冀
寤 天聽天聽乃迕遷賈長沙太息流涕萬事參差
暨移留都瞻 天彌遠益保朴忠誰意旋反 聖思
忽逮有 詔賜環試于成均晉于講筵天與貞則屢
躋不移巖巖立教侃侃陳詞動期道合邊恤俗盤千
人所依一夫或憐遂去 帝側俾貳南曹來若泰山
去如鴻毛先生曰吁我當往矣上書白老 報曰歸
止歸止丘樊畢景是圖萬方念之猶俟來蘓昊天不

甲大星俄殞賢者弗壽聖言安準嗟乎先生道可康
世文學其餘志厄途窮俛而著書著書孔多羽翼宣
尼宗朱斥陸學者以師假令先生年得耆耄遇倖旦
與將勒勲旂常安號討索也嗟乎先生歿矣不歿者
名彼生無聞何若無生某等鄉邑後學瞻仰在茲奪
我耆鑑同情共悲特念縻爵闕下負土無從詞不
盡哀聊寫深衷

詞林合祭呂涇野先生文

休矣西土爰有呂公身歿名立太華空同淑質自天
少敦貞素年踰耳順厥履彌固令德旣昭而詞孔宣

闡經翼聖往紹來傳聖道維何忠孝是止公實踐之
有言匪侈始公魁世人稱溫飽公志弗存食貧甘老
解組歸來卿曹右職扁扉匿影環堵荆棘詩讚羔羊
孔稱淵憲今故相觀曠世同券有訃歛聞哲人其萎
群紳用悼 天子曰咨講筵故從卹典示慈道鉅數
竒 帝念在茲嗟嗟呂公言方著蔡行等璿瑛如春
之蓋如砥之平濠汜俄及霖雨空情國亡其實士喪
其程某等舊寮新悲哀不臨木瞻深室遠有詞載軸

詞林合祭張陽峯先生文

於乎先生令德純懿如玉隱璞不暴其光而輝衆目

書貴欽若詩詠柔嘉公也蹈之譽徹金華 天子曰
咨惟汝予弼位旣崇矣厥心乃慄中興之治外攘內
修論思密勿以贊 皇猷旦奭翼姬肅曹佐漢今古
勩力膚功咸爛洪川中濟有杙斯摧苾苾和羹而失
其梅頃公拜 恩佩玉煌煌朝簪駢趨賀公于堂榮
枯倚伏則莫可准慶者出閭弔者旋軫事聞 九五
若曰噫嘻感今追昔罷朝撫髀早參經幄末與邦禮
帝聰以闢 王制聿起運遘好文大昌厥詞賦成奪
席奏入稱竒一朝奄化萬事俱盡死生定數智者勿
論公達幽明瞑目長畢乃今之人思公罔極百身願

贖九原不作國中休杵賢士悲閣靈輶旣戒餞實在
門舍此京室湘山望奔騎吹喧奎旌旒蔽天 皇錫
異數以象生前有傷公者旅櫬孤征德人不嗣視天
冥冥嗟嗟否否天道忌完旣貴旣壽公其用寬

謁侍歸展告先公文

繫自壬寅言邁于京逮今旋返霜露四零在職望丘
天遙壤隔林茲逝節徒爾惻惻母也念只勅兒請告
告于 天子曰汝歸造旣造于家爰哭于野感今喟
昔誰能忘者有堂有室母卽是居翁也幽局各安其
廬

祠堂成祭告文

自楨髫年見考君祀先謹然惟于寢考君好賢聞禮以爲庶人祭于寢也考君旣歿而仕禮得立廟祀先然故宇局隘計拓而營之未能也嘉靖庚子幸改宅稍敞留地一區于堂之左擬廟乃楨却宦游未就禮稱君子將營宮室宗廟爲先乃楨茲顧後臯其大哉丙午楨復告還始立廟于嚮之虛所製四櫝座遷各主于其中起新模薦孝思焉楨按典記自大夫以下不列祭及高祖之文又士祭自祖禰則止謂澤有淺深斯制因隆殺云我高祖按察君始遷華始爵寔啟

王裔科第詩書綿至今世濊哉先德寧忍殺之弗祀
曾祖次公我王父父而王父庶子也我考君王父長
子也稱宗王父不得禰次公而考君爲宗子寔得祖
次公考君往已祭之禎又考君之長子爲繼禰小宗
小宗固得祭三代也逮祭高祖凡四代而禎不爲僭
也古者代爲一廟制備而象魏今廟止一楹閣藏四
主卽祭寢者猶必及之而况得廟乎禮殤與無後者
祔食于祖考制則各因代祔今屋隘更置他几不得
而大者孤者又苦無依也將取歲首終華人生歿之
義以元日腊日爲位招祭之又萬物本天人本祖始

祖弗祭如情何乃竊古制以冬至之日爲壇祝拜之
歲一行其廟祭以四仲之月舉忌日腊日並舉自餘
俗薦則禎母劉故刑于考君奉先倍孝能爲之不爲
典嗟乎自宗法不講祀典久湮卽學士大夫甘自類
于野人今廟規度儀法未盡符古然由是得以合先
追遠附于食不忘報之義仰冀諸慈冥翼咸相懋王
氏宗庶廟祀永永矣

祭甘經歷文

謂壽必賢而公靜淵顧不得年謂仁必嗣而公孝植
孝子乃匱謂才必達而公崛拔臺幕不越謂天從人

人言恂恂轉災其身調理御數吉人儉受于何則厚
謂聖言信不善或順善茲蹈釁總之天遠默默巫咸
不測古今皆惑回也弗延鄧攸絕傳匪公獨憐有櫬
在旅仲容斯舉征日煩暑汗馬塞塗送者傾都或悼
或吁秦蜀形親我等故人視衆倍辛祖奠薤詩以當
別卮以當驪詞

祭外舅半山公文

歲秋八月有伴來詣訃而乞銘主翁納寤予曰吒乎
駭粟不制昔也何健今也何脆矍矍遺老晝飲宵繼
彼皆泥頽翁獨揭厲嗟杯中物人曰綿世積而鬱毒

翻以速斃位不當才休且飯糲因覓醉鄉遂游無際
狀楊氏爲載弗漏細誌掇其槩以視來裔東門之丘
送車嚶嚶或紉而謳或酌而祭余豈異人柰何匏繫
神奔跡阻西顧沾袂日下更東美門永閉悲離傷絕
怛若受劇旣以銘歸貽書伉儷以贈以祀有亡焉計

詞林合祭王懋中太史文

語曰寄珠于人求不越宿藏劍于匣化不踰年其王
子謂乎王子負噐而需時蓄才而善閔乃其光益灼
灼見也斯與照乘之珠斷犀之劍異邪則天固靳之
矣而弗能收之邪嘗觀夫東下之波與西逝之鳥卽

彭殤等死耳顧獨念賢者天才者促蘊之雖竒施之未逮悲夫昔賈生早萎李賀弗延君子曰旣賢之才之而又夭之促之天其謂何乃今王子又奚異于兩生云人恒言有不可詰之天今王子若此豈非不可詰者歟

同館合祭王太史文

王子之行賢者之侶也乃遽五月而疾三十八歲而死朝大夫聞者無問識與不識皆爲雪涕余等固重有傷焉王子操儉慎微密以名其德然亦以是殞其身病且劇恨猶瓊屑米鹽之問少恢恢大也雖然

伯牛之洪也隆然瘠矣顏氏子之弗遷怒也溘然夫矣此又關人哉夫命猶幅尺也杼柚旣定能益而長乎王子獨柰命何若曰作善以速殃勅躬而滅性天如是冥冥也非然哉非然哉

祭先考贈君文

嘉靖二十八年歲次己酉十一月丙子越十二日丁未翰林院修撰男維禎謹治酒脯果蔬設在旅舍祭于 贈檢討考君之位曰孤今者叨沾 新命遷秩修撰矣 國制翰林歷九載滿得陞二級孤以資進非由望擢也始考君教孤令任一職効一事言至今

存矣孤奉之弗懈勉勉在位柰疎鹵淺細何夫詞命之道關國華采庸詎可疎鹵淺細能也比茲九載至孤捫心惶悖解纓待黜會 詔以例遷大哉 皇仁真不奔敞帷矣故事由修撰而又進浸顯浸重且畀之艱孤于詞且未良又安能肩其鉅也我母先是還里權修考君祀孤殆將歸而掃蒿萊矣人生進不善宦又退不明孝則忝所生甚矣孤久懷斯念因之申白可不云何夢以通諭欽哉仰哉

祭叔父王次公文

日值上浣而月仲春桑梓在憶客來自秦余忻坐客

客語逡巡次達叔氏災丁其身是邪非邪情蘄意嗔
無幾承訃語合來賓手訃嗚咽母也愴神室婦在侍
泣下沾巾幼女何知雙睫津津哀莫酷斯天胡弗仁
旣奪余父叔亦沈淪崩腸刺骨腹轉車輪俛踏厚地
仰叫高旻生有夭殤叔也七旬壽則壽矣柰失所親
疾云大劇醫技罔伸五日不寤千劫長泯嗟嗟我祖
行備且醇二父承之兄愛弟馴我年弱冠卽罹苦辛
叔也視之旣篤旣頻嗣脫于厄忽躍風塵爲教寔繁
勉矣良臣豈不思報石粟則貧撫今憶昔曲曲難陳
靈遊何所我繫 陸楮末由登木瞻雲惟顰叔有四

男屹屹振振兩我呼兄稱席上珍二季積著或彌千
緡環過其家醜酒割鱗問欲以事靡令弗遵卒哭之
悲感及比隣訃我詞畧詞畧意真伴來致哀蕪葬是
詢胡兆之卜我言可循城南古丘鬱乎嶙峋左爽右
塏土匪常倫二父厝之翼挾股跋千秋萬葉有亨無
屯往余卜茲旣刈荆榛垣墉外繚佳木纂纂頃計額
帝將以私論歸徒嚴魄歲屬良辰沈沈九關上謁
懼擯乘間入告有懷竟申先茲治奠捐帑賜銀匪
物之貴斯念誠寅

祭前山先生文

往槓之京時先生猶伏在淺土不謂其今歸卽九原也先生歿十五年而始葬葬時槓滯在史局不得與緇謳列歸乃由阡路攀宰木則愴然感懷焉槓自髫年卽就先生學先生若姑母咸予視之先生所督教期冀我者咸鴻鉅之業非常之事以今睹世師復何如先生者也昔宋玉哀其師屈原撰九辨之章槓才驚下不逮前英欲圖隻言申寫之安能哉世俗好華而先生樸人情好炫而先生晦凡此皆足範今傳後而先生自爲誌述之亦自信其當無愧也晉陶潛令彭澤自解印歸歸而有餘快至老且卒手勒祭文述

平生之槩君子以爲達乃今逮先生特兩見耳世何
有如先生者也楨憶思往訓則爲之悽談述高雅又
爲之喜二念橫胸非詞末展聊陳悃悻實不盡萬分
一也

祭孫通府文

先生歿二十四春秋矣子大亨竟不能歸先生于土
尋而厥配孺人亡楨小子益怛然痛懷焉先生方廉
介直罔觸忌諱固狷者之高蹈孔門之遺賢也乃宦
旣不達卒而其嗣又阨塞窘甚此何以解也傳曰天
道無親常與善人若先生者以謂善人非邪楨自任

衣冠卽睹記先生行履彼其時先生已拔俗獨立莫有耦者物逐運移俗因化改抵于斯會又能有望先生下風者哉楨小子高先生之節而閔其滯淺土也乃爲購阡開窆與其配孺人合定萬年之宅焉小子誠重亡友且用補天道之漏非以予大亨故也神其鑒之

祭贈君墓文

我君距今歿二十有五年矣而男署留翰設令我君在當七十五歲耳人生以百歲爲期而耄耋固時時見之我君胡不逮哉我君教我學甚篤不食其力緬

懷往昔淚淫淫下矣茲且南邁取道丘園展此永思
詞以酌之靈知之不

祭仲父質菴公文

仲父歿一歲而楨歸歸見其堂除虛則哭于其堂茲
覩其美門閉則又哭于其野焉楨之歸也爲署留翰
乃取道家山展此哀悰仲父有潛德高行令黯黯不
能表是楨之臯也夫是楨之臯也夫雖然有須哉

槐野先生存管稿卷之十八

槐野先生存笥稿卷之十九

左輔王維楨著 館甥渭上南師仲編

祭文一十六首

祭趙宜人文

詞林合祭王太史孺人文

同鄉合祭王太安人文

祭趙侍郎母太淑人文

同年合祭王太恭人文

祭盧太史孺人文

同鄉合祭太恭人王母文

詞林合祭王太恭人文

同鄉合祭龐母太孺人文

祭胡宜人文

會祭孫太夫人文

祭趙宜人文

祭南恭人文

哭亡女淑姬文

祭妹文

送亡女文

祭文

祭趙宜人文

嘉靖庚子仲冬 誥封太宜人上黨趙母都氏卒于
渭南旅所其子四川憲君扶櫬東還道出華州華州
人王維楨官翰林檢討寔與憲君同年進者也誼關
世好情倣生芻爰敦非奠申以蕪辭辭曰巴竹甘笋
錦水饒魚子芍克孝手轉潘輿大家逐子于渭之里
寶婺俄沈雲輶倏起劔門何在潞澤已遙養弗從志
數也爾逃川嶺盤盤言歸言邁素轂丹旌路人用喟
宵猿晝鶴雪館風灘孤魂獨子有淚如潺予也秦人
母迺晉族三徙成名爰知令淑令淑已矣而貴而榮

歿有不朽何死何生西蜀使者繡斧屹屹後祿難量
慈訓之力靈兮于征爾家爾庭悃思軌則鄉念儀刑
我手椒漿我歌楚些哀緣義起余涕沾車

詞林合祭王太史孺人文

王氏有赫厥惟太史休矣碩人寔天作比作比伊何
等芳齊美如珪儷璋將衡和正太史温温崇樸去侈
豈俗之移唯道是止朝士翕然稱曰君子皦皦令名
寧獨文似碩人相之克順克理解珮齊眉動符前軌
媚于士夫專愛姑妣令德允臧勿云織綺碩人之生
名宗貴里兄也班生翁爲孟氏懿質旣貞內戒爾爾

乃歸于王閭譽遂起 帝制有嘉爰旌幽履幽履誠
揚從以錫祉吉凶何期慶弔相隨大命奄忽殲此淑
姬考祥元吉人皆信之仁賢不祿母載空詞鞞鞞太
史悼往傷離形匿世隔誰哉予宜比目失浪連理摧
枝匹翼垂翔云胡勿悲塵掩遺琴蛛網虛帷物不毀
故而人不追某等四海之人太史同池太史旣戚予
戚在茲生非金石誰能勿萎或彭或殤造化小兒晨
旭夕沒春卉秋腓理無久視達者不疑碩人克剛安
此長畢欽德將祀冠裳有秩

同鄉合祭王太安人文

猗歟阿母振王氏宗何以振之子戶部公戶部太公
隱德隆中太公之先奕世朴冲爰逮戶部矯矯奮庸
劉晏經國蕭何餉戎朝簪籍甚里門崇崇伊誰穀者
阿母之功太公剛倡阿母柔隨太公中殞阿母峻持
長男戶部驅事宏詞中男力本勉旃小兒三男屹屹
月旦稱徽赫赫戶部卒顯斷機彼蒼眷德八表介祉
行有板輿御有嘉旨俄云辭堂戶部摧毀豈不考終
痛我令妣某等戶部與游識母于子匡闡著誠大家
趾美仁族卹孤邦媛同軌月落在天其輝不死母也
云亡遺芳在里戶部跣奔爰卽總帷緋謳伊阻望酌

在茲

祭趙侍郎母太淑人文

於赫趙氏實生司徒茂功淑問以翼 皇圖昔我秦
服戎寇邊隅內困給饟利害須臾趙屬保釐洪猷以
紆權施經據靡滯靡迂卒使戰士飽奮誓共忘軀獻
猷奏績 天子曰俞旣乃訓俗阜財瓔視惇孤循行
勞來定擾返逋秦人德趙何以效吾趙有壽母有祝
有呼呼曰阿母若子我蘓祝曰阿母千歲是逾人士
作歌爰採謠歛作者萬言一言非誣群言旣集予序
以傳誰謂比周而德用宣趙徙度支 詔佐晉邊板

與于邁逐子翩翩無何訃至月沒雲遷悼今喟往實
用惻然我聞阿母誕膺溫惠容止靜專仁逮宗戚德
隆譽延泉源木本令子象賢恭穆仁愿視則忘愆胡
不永永副我祝篇豈云弗壽謝彼千年予繫金閨母
家澶淵弔阻臨木望蔽逕阡將使附誄目斷情連尚
圖石室令德用鐫

同年合祭王太恭人文

於鑠王氏厥維藩公藩公載興夫人以崇夫人伊何
藩公之母刑家誠子旣順且矩藩公率之蚤厲雲達
脩能嫖節仍倡厥嗣大道旣隱末季靡靡如脂如韋

俗移志徙矯矯藩公砥柱橫流信道委命寧沈母浮
孟遵仁義爰念斷織駿轂用章母訓是力昔在辛卯
逐子于秦我等諸生子與陶甄舊德允懷日月不滅
母也訃聞相告悽切豈不壽考猶謝百齡豈不榮茂
我願未盈洛陽北坂薊野望遙緜謳無從焉酌桂椒
詞以寫之將之雲翰蘭茝珠沈怛焉惻歎

祭盧太史孺人文

賢豈必壽促延惟命孺人奚傷靈輒旣戒違此京室
返彼齊疆嗟哉盧史休茲令匹溘爾云亡偏輪不轉
隻翼不飛盧曰予殃孺人歸盧遺貧飭敬人言孟光

既盧歷顯一綜內治一秉官常官常易修內治希邁
盧也二良靡實弗宣如彼宮鍾有敷載揚猗猗蕙蘭
春爲茂草秋萎嚴霜盧曰悲乎豈怨霜露所懷舊香
漢濱遺珮荒忽邂逅交甫不忘矧茲同禍以歌以泣
痛于蒙莊有儕來集哀盧之哀酌孺人觴於乎孺人
生不踰閻冥魂于邁焉識故鄉丹旄在途依方南指
魂兮與翔

同鄉合祭太恭人王母文

繫中憲君厥初作儷寔維太張張也云歿李筮來歸
令德繼明張有六孤李爲鞠之若離于腸或世儒冠

或彌素封疑疑光光中有次公爰貳秩宗 天子稱
良秩宗德李曰孤等立母氏扶將初李嬰疾秩宗顙
禱庶幾無殃其若命何殞先黃髮未秋忽霜訃來自
里詭矣秩宗皆決形喪是邪非邪頃之訊定一哭輒
僵我曹鄉人趨而就弔勸慰萬方秩宗曰嗚悠悠長
訣予阻殊鄉僉曰已哉且乞 渥典榮施黃壤秩宗
輟泣伏苫草奏徹于 九閭維 帝曰俞降制如求
璿割煌煌噫嘻恭人德則鳴鳩嘉問蘅芳彼何人斯
不字遺孤霜野彷徨芳臭俱流有言之唾有頌而揚
秩宗于歸大隧開塗慈魄永藏有司奉 詔祀筵有

楚左猪右羊靈車載發鬼阡廣陌觀者堵墻互美適
傳以榮以大謂莫能當我曹庶茲紼謳末由回首秦
疆秩宗爲位群來酬之爰申斯章

詞林合祭王太恭人文

世傳閔損王祥爲純孝者謂其母繼而難事也乃茲
恭人寔宗伯公繼母宗伯公事旣孝而恭人性復慈
豈非古人之所難今人之所易哉宗伯公之母亡遺
有六男子恭人顧復隱軫卽如已出彼閔王二氏之
嫗不能安隻孤而况其六乎難矣難矣恭人卒于家
訃至京師宗伯公擗踊震悼痛若弗勝彼其中誠有

所不可解也宗伯公哀有間則數恭人之懿行幽芳
焉曰恭順貞淑事事在躬璧完而珠輝蘭芬而月皎
也夫女一德稱善乃茲衆休咸會卽古大家奚多焉
嗟乎月沒留照蘭死存香苟爲珠璧淵沈愈光恭人
逝矣何在何亡

同鄉合祭龐母太孺人文

語曰深山大澤龍蛇出焉其孺人謂邪方龐翁之尉
內江也內江盜起攻城且陷令丞悉亡匿獨尉乘城
拒守孺人從後持之若曰夫死官身死夫者卽古烈
士之風何以加焉今侍御君在列翼翼屹屹有斷鰲

立極銜石填海之意斯固胚胎非凡種能有也孺人
雖處在閨閣然識達事理里婦有以情白者得孺人
爲解如病投劑洒然脫矍然寤也侍御君始爲潤州
理獄多平反萬口歸明則孺人其本乎昔人謂陰德
興後仁者永年今孺人年八十七而卒又有子如侍
御君嗟乎兼之矣某等鄉人承訃踵趨尋茲置奠實
仰休嘉而下拜焉

祭胡宜人文

今茲春杪我車西還有美胡伯華轂載宣斷獄疾流
覆暍比天政通體暢色澤而鮮悲歡倚伏節月代遷

爰及秋孟條爾黯然我訊胡伯白內子焉內子慎職
戢戢勉旃沈痾旣久百憂余煎余貌奚豐余色奚妍
居無何頃有訃吾箋上池不効西母來延我奔胡伯
胡伯涕漣悽悽百語一語一憐祀事孔脩往爾治籩
蘋藻在澗孰薦于筵言已而泣我勸且堅恢恢大塊
含載億千或夭而折或邈以綿生不由吾去豈吾牽
在昔達人謂世虛船不哀殤子不慕彭篋公何爲者
有淚迸泉胡伯戒輶載逝者旋引紼傾城送車盈阡
我時道左臆想目眴往也素輶來而翟輶所以胡伯
別意旌縣生不踰閩安識山川或降或升丹旒導前

哀笳何咽愁雲停翩如怨如戚茲理實玄嗚呼噫嘻
彼姝者荏枯而存香榮爲絃緹何死何生芳臭嬋娟
榆柳誠茂詎此比肩我今祖亡有詞載篇靈窺文義
諒鑒吾虔

會祭孫太夫人文

夫世稱姚江孫氏爲鳳林夫人爲丹穴者蓋謂其所
產異也今諸君翩然振襜燁然照世矣余等以爲此
非獨所產異也固誠有教誡之力焉在昔逆藩之變
一時甘心者豈少乎乃忠烈公獨死之當斯之會夫
人蓋痛之甚卽何難于一決顧諸君未立乃忍而至

今今其年九十餘高矣語曰死有輕于鴻毛有重于泰山其在孫氏可謂兩得之矣余等又惟下宮之難程嬰不死竟以振趙氏後彼固丈夫行耳則何異焉乃若夫人蓋箕箒之流品閨閣之淑媛也固未始有稽古之學博觀之好也乃卒與同其志世豈有兩之者哉今或鬚眉而為婦女冠劍而在溝壑智愚之相距又何啻千里也余等與夫人之子三君者游因竊識夫人之志于其臨穴乃為之詞而章其休焉非諛之也

祭趙宜人文

奕奕大趙門閤巍如王考司牧露冕赤車三傳逾振
簪筆王除鳳兮罕儷艱哉相於有姬曰牟人亦曰凰
應鳳之求栖于後房飛則比翼以和以倡月旦有評
維趙之祥厥祥維何祀事孔勤蘋蘩在豆神保聿欣
豈不儉德孝養必芬翁姑燕喜爰相夫君夫君碩碩
載游于吳棘寺稱平後趙前于趙入自外舉案以趨
君也有婦余也有夫高室鬼瞰嫉憂來于有鳥銜羽
奄爾成單譬彼比目失之狂瀾莊生擊缶音切鼻酸
吳越壤界猶隔雲山旅櫬斯發望望海灣夫君送之
止于郊關魂逝形留癡立不還不還奈何爰卽君詢

逝掩一杯一訣長泯吾屬勸斯乃返其輪往哉宜人
翩翩駸駸

祭南恭人文

猗歟南氏二鳳翩翩元方既殂諸孤眇綿誰則振之
仲氏最賢爲授弓裘以世以傳有嫂妻其慰者疇前
仲氏揖戶恭人捧筵飲之食之既誠既虔室無二語
歡無際埏產有一雛鳳毛比始恭人視之與孤同憐
出必問往入則白還豈不踔厲咸策之鞭仲氏初筮
式游于燕恭人旣從內事忘牽宋郡掌平蜀道霄連
逐君于邁遂諳世緣夫君倦游勒功代邊鷺車言歸

隨以翟駢恭人拜嫂敘離嗚咽諸孤班謁拊頂摩肩
當此之際雖飛刺天晝直金門夜檢芸編恭人念之
爰遺素箋八行珠綴總之勉旃忌哉天乎虧物之全
天乎忌哉奪人所便夫君悼之影隻形偏鼓缶長歌
淚若灌川嫂氏拊牀呼神叩玄彼胡永永此獨斯年
諸孤環哭踊地地穿生不由胞痛若戈鋌鴈書告哀
郎君瞿然夢邪真邪骨解魂遷望雲長奔秋風與旋
峽猿吟嘯河水濺濺郎于斯時肝腸百煎迨及門閭
觀者駢填伏木一叫震雷破巔翁也持之勉止語圓
嫗歎金母翁乃彭錢郎君聽翁且泣且言醫不已疾

禱祀尙存西禮白帝南禮上元東禮木公北禮星垣
四禮誠畢意且返魂禮如罔効爲示患原我走十洲
求丹問門一拌形變數粒體温仙人閱惠患若或援
諸皆弗試坐斂厚坤言已忽仆情極殼吞損乃恭人
郎君之姻親也義托葭葦承訃廢餐泊得曲折春朝
罷罇江籬可薦驛道愁煩官縻敢脫執紼空論使來
會葬授令飛翻日毋輟運足毋滯跟遺書舍人蔬剪
家園牲牛羊豕取具山村左羅五鼎右列三盆物儉
而陋意則良敦

哭亡女淑姬文

父槐野翁哭長女王淑姬之柩曰嗚呼淑姬我來自
外而汝不逆我于門內牽衣袖以行邪我拊木大哭
淑姬者以百數而淑姬不一從木中應我邪我來拜
堂下省侍太夫人而淑姬恟怳飄忽不在左右淑姬
安之邪我入淑姬閨閣中閣中唯有鏡臺粧匣其上
委塵淑姬安適而弗理邪我觀淑姬雖幼然靜如山
不類短折者乃顧短折夭滅亡邪我乃且哭且輟且
疑且視而總帷動香風生豈淑姬來邪我延佇淑姬
來思一拊頂行倚几而抵暮矣第見窓燭搖城烏栖
相呼相引八九子而淑姬卒不至淑姬果夭滅亡至

短折邪他或痴如醉或毒如蛇或躁如風馬或流漫
如不定之河乃不死顧死我淑姬邪我齒髮向頽矣
而靡有一丈夫獨有淑姬在而不能留豈淑姬之會
厄亦高明之室鬼神瞰之邪太夫人言淑姬病忌醫
醫來輒以被蒙面不肯啟手令視脉嗚呼斯固所以
夭短折邪淑姬生年十三歲耳甘一死不欲踰大閑
淑姬似我誰能爲我起似予邪送太夫人于吳江之
上時淑姬投淚再拜哭常時未有也由後推焉百年
訣絕卽此長畢矣我安識之邪太夫人失淑姬譬猶
獨栖之鵠我失淑姬譬猶落葉之榦兩慟相視蔽如

崩巖淚若縣河淑姬亦慟之不邪淑姬且屬續氣喘
逆不能語乃瞪目視左右勉吐一詞曰死則死矣獨
恨不得見我翁耳嗚呼此語此慟何日忘之邪何日
忘之邪

祭妹文

阿哥槐野山人旣出亡妹于土中將徙之以文爲祭
哭之曰瘞汝幾何肌銷骨脫流光不處貌亦隨遷往
憶歛汝紈素雪鮮頭插鳳釵珠綴齊肩母氏痛極親
下金鈿旣已置含手續牽纏今茲發視泥沙委填爰
檢前儀前儀不全臨穴而顧有漏下穿山流灌注萬

物能堅撫膺頓足淚下濺濺往事旣已嗟何及焉乃
持剪刀雙裁絃縫衣以吳錦上盤青蓮鬪體旣毀盡
眉補鬢枯骨再榮醜狀成妍伐木易棺萬世可延改
竈東麓刻石紀年言告母氏母氏蹶然人孰無死安
者爲賢明發去斯惡戀故阡導有丹旒路有紙錢祖
筵列豆澗藻澤釜送車百輛纓冕嬋娟往哉樂只無
固留連

送亡女文

阿翁槐野翁將葬亡女淑姬于城南之野乃送之以
文曰城野雖曠猶邇山村望室雖隔猶得歸魂豈不

戀汝置汝九原亡歿異托疇其永存我有果蛤來自
吳門陽羨雀茶美掩芳樽取以餞汝汝其臨軒柳車
被錦丹旄飛翻騎吹行歌觀者雲屯何死何生榮耀
寔繁汝去汝忻無苦無寃時則省汝爲掃丘園庶其
樂之庶其樂之

槐野先生存笥稿卷之十九